



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 3

Yangia anidakangma :



Tir Yimym



tir_yimym



tir yimym


TAPAK 7



Firhad Hakim

TMC-i Firhad Hakim, Arup Roy
aser tangar 6 mintok

Senotsü ochi mashi ken o nung taoba
Nepal finance minister puogo



VOL. XXIII ISSUE NO. 251 (ADOK 251) DIMAPUR RASEMNÜ (WEDNESDAY) AAMI (JUNE) 24, 2026

₹ 5.00

Guru Sangyusang Pongener-i Padma Shri agizükogo



Dimapur, June 23, 2026 (TYO): June 23, 2026 nü President Droupadi Murmu-i Guru Sangyusang Pongener nem Padma Shri agütsüogo.

Rashtrapati Bhavan, New Delhi nung Civil Investiture Ceremony - II agidang Guru Sangyusang nem folk artist atema iba sempet agüja liasü.

Arishi küm 83 tain Guru Sangyusang-i Naga nunger sobaliba subotsü agir kanga akhümketa shilem agiba ajanga iba sentong tali meraketdakja liasü. Iba sentong nung Prime Minister Modi aden.

Guru Sangyusang Pongener-

i Art wadang nung Padma Shri Award 2026 anguba atema tenüngsang agütsür ta Nagaland Chief Minister Neiphiu Rio-ia metetdaksüogo.

Guru Sangyusang-i Nagaland nung folk heritage wazüka ayutsü aser ajungkettsü asoshi taküm piyong bendanga agüja aruba atema tetushi agütsür ta CM Rio-i ashi.

Guru Sangyusang-i küm 60 tema traditional art forms aser folk traditions kümzüka ayuba mapa inyaka arur aser iba ya Naga cultural heritage wazüka ayuba nung kanga dang tongtipang shilem agiba lir ta paisa metetdaksü.

Tenyimi Union Nagaland-i Naga nunger 6 atema temeten meshir

Kohima, June 23, 2026 (TYO): Manipur nung Naga nunger trok tepsetba khukhua aitsür aser parnok tepsetertem ozüing tesashitiba agi merenshitsüla ta Tenyimi Union Nagaland (TUN)-i takhangba agütsüogo.

TUN ya Nagaland nung Angami, Chakhesang, Pochury, Rengma aser Zeliang kintem atema tematiba telok lir aser mezüngbuba Annual General Session alidang parnoki iba bangzüing renemogo. Iba sentong ya Angami Gazetted Officers' Krotho Building, Badze, Meriema nung ayonga agi.

Tanita tetenzüklen Kangpokpi district nung Kuki telungpurtemi tai maketba Naga nunger trok tepsetba aitsür ta TUN-i metetdaksü.

Manipur aser India sorkartem den ozüing amertemi parnok tepsetertem maitsü jangjatsüla aser aputsüla ta TUN-i takhangba agütsüogo.

Iba mapa inyakertem ya ozüing tesashitiba agi merenshitsüla aser temeten agütsütsü mapang atsülangra tensa mejungi akümtsü akok ta parnokisa shiogo.

TUN-isa tetsürtem aser tanurtem dak tashiyim mapa kanga bulua inyakba atema tebilemstsü abenba

metetdaksüogo.

Tetsürtem aser tanurtem kümzüka meyutetra loktiliba tejakleni maotsü. Item tatalokba nung mapang shitak nung temeten magütsüba ajanga aibelenertem tali temulung uludaksür anungji tetsürtem aser tanurtem dak tashiyim agi shi nung medemba, kongshiba ken o tem tekaratiba nung angadanga obendang agütsütsüla ta TUN-isa metetdaksü.

Nagaland Tribal Hohos Coordination Committee (NTHCC) ajanga mapa inyakba pelashishia agizüker aser NTHCC-i telongjem atema inyakba ajanga Naga nunger temetentem, taginübatem aser tejangrabatem kümzüka ayutsü ta TUN-isa ashi.

Tenyidie oshi ajungkettsü atema TUN-i Ura Academy maneni nungittsü. Ura Academy ajanga university level tashi Tenyidie bener atuba atema tenüngsang agütsür ta parnokisa ashi.

Item bangzüing nung Minister K G Kenye aser Minister Salhoutuonuo Kruse na lia TUN president Kekhwengulo Lea, Resolution Committee convenor Khinyi Woch, secretary Ado Nyusou, aser committee members Thejao Vihienuo, Neilo Khape o Dr. Hiabe Zeliang nungeri sign asü.

Naga nunger külem ola aser lenisüba mali akümer: Minister Kenye

Kohima, June 23, 2026 (TYO): Naga loktiliba nung külem ola aser lenisüba samaa aoer anungji telemsa tuluba küma maodang nisung ajaki Naga yimten tebilemstsü atema ka akümtsüla ta Power and Parliamentary Affairs Minister K.G. Kenye-i ashi.

Naga nunger putiotsü nung kanga dang tongtipang mapang ka süir aser asenoki yimten tebilemstsü ya mekoktetra asenok loktiliba tamendakdak tashimait akümtsü ta pai ashi.

"Asenok kanga tongtipang mapang ka atonger. Mapang talangka süia aruogo aser yimtenren wadang majungtsü ama bilemer" ta Minister Kenye-

i ashi.

"Naga nungeria akhümtsübuttsüsa mesüra tashi angatsüsa telok ka danga mali aser iba ajanga loktiliba nung telemsa adoka lir. Asenok madak tematiba telok ka mali aser iba jagi asen loktiliba mazüoktetet aser iba ya tetsübuttsüka lir" ta paisa shisem.

Külem maitsü, lenisüba mesüra len aniba reju ka melira asen tarutsüji tetsüremtsüka lir anungji asenok ka akümtsüla ta Kenye-isa ayongzük.

Tenyimi Union ya litsü nung ajemdaker masü saka Tenyimi kin pungu- Angami, Chakhesang, Pochury, Rengma aser Zeliang külem jakzüka, putiotsü aser

sobaliba inyakyim nung ajemdakba tentetba lir ta paisa metetdaksü.

Nagaland litsü kübok Tenyimi kin pungui tebilemstsü balala ajuruba asoshi TUN tentet aser kidanger state tem nung aliba Tenyimi nunger den-a tetibo meputep asütsü ta Minister Kenye-isa metetdaksü.

TUN ya sobaliba mesüra yimtenren telok ka masü saka Nagaland nung Tenyimi nunger dak sendakba tebilemstsütem asoshi inyaktsüba aser tanga Naga kintem den tesentaktep tajung ayutsü atema tentetba lir ta paisa nenshia ashi.

Tetsürtem aser tanurtem kümzüka ayutsüla: Minister Kruse

Kohima, June 23, 2026 (TYO): Ketdangpurtemi tetsürtem aser tanurtem kümzüka ayutsü asoshi mapa akangshia inyaktsüla ta Women Resource Development and Horticulture Minister Salhoutuonuo Kruse-i ashi.

Kruse ya Nagaland nung

mezüngbuba Minister lir aser tanü Kohima nung lai osangbener den jembidang "tetsürtem aser tanur tetsürtem dak tashiyim inyakba osangtem kanga buluba atema süoki ia bilemer" ta ashi.

"Tanü asenoki anepdang shia osangkakettem nung iba indang osang angazüker. Anogo ishika lir

ano iba tatalokba indang angashir. Asen ketdangpurtemi tetsürtem aser tanurtem kümzüka ayutsü atema tali temerangba inyaktsü nüngdaker ama nibo bilemer" ta laisa ashi.

Tribal Women Bodies of Kohima ajanga mass public rally agiba sülen Minister Kruse-ia kasa olen jembiogo.

CM Dr Rio-i anir Nagaland House semdangogo



Chief Minister Dr. Neiphiu Rio, Deputy Chief Minister, T. R. Zeliang, Deputy Chief Minister, Y. Patton, Advisor Dr. Kekhrielhoulie Yhome aser ketdangsürtemi June 23, 2026 nü Nagaland House, 29-Dr. APJ Abdul Kalam Road, New Delhi semdangdang agiba noksa ka angur.

Dimapur, June 23, 2026 (TYO): Chief Minister, Dr. Neiphiu Rio-i June 23, 2026 nü New Delhi nung Nagaland House nung kitsükkirong lendong atalokba semdangogo.

CM Dr. Rio den Deputy Chief Minister ana- T. R. Zeliang o Y. Patton, School Education & SCERT Advisor Dr. Kekhrielhoulie Yhome aser ketdangsürtemi Nagaland House semdanga liasü.

Iba mapang Resident Commissioner Nagaland House New Delhi, Abhijit Sinha, IAS aser Joint Resident Commissioner NH New Delhi, Sharon Longchari nati CM Dr. Rio aser pa meinertem dang lendong atalokba aser iba sülen inyakba osangtem lemsatapa liasü.

June 22, 2026 nü Nagaland House nung Room No. 2 nung mi adok. Iba mapang guest

house nung ainer asem anenzüka liasü aser par asemprong yiruyibong kecha mesüi anizük.

Nagaland House staff-i mapang shitak nung mapa inyakba ajanga miji tulu küma moudaktsüi azüoka liasü aser fire brigade arua ensep.

Room No. 2 nung split air conditioning temalen nungi miji adok ama kuli bushiteta lir ta ketdangsürtemi ashi.

Mokokchung nung AR ex-servicement rally ayongzük



Assam Rifles DG, Lt. Gen. Vikas Lakhera den pa kübok aliba tulurtem, shilem agirtem aser Nagaland tesem balala nungi ex-servicemen aser parnok dependent-tem külemi telok külemi tangokba noksa. Mokokchung, 23rd June, 2026

Mokokchung, 23rd June (TYO): Assam rifles ex-servicemen pur atema rally sentong tulu ka yangi Mokokchung nung ayongzuka mungogo. Iba sentong nung Mokokchung, Wokha, Kohima, Noklak, Tuensang, Dimapur & Longleng district-tem nungi ex-servicemen aser parnok dak nentaka alirtem (dependents) noklang asem shi arua shilem agia aden.

Iba sentong nung Director of General of Assam Rifles, Lieutenant General Vikas Lakhera AVSM, SM, tongti

tesemdanger liasü. Iba sentong nung IGAR (North), Cdr 6 Sector Assam Rifles, Cdr 7 Sector Assam Rifles nungi tulurtem den ano Mokokchung district nungia administration, police aser Civil Society Organization balala nungi meyongertem arua aden.

Jangratemtsü kaji iba sentong nung ex-servicemen aser parnok dak nentaka alirtem (dependent) asoshi angati temang reprangdaksüba (free medical & dental consultation) den mozü angati agütsü. Iba sentong nung Veer Naris, Veer

Matas, Gallantry awardees bilemteta parnok nem aküm tetushi agüja senpettsü.

Sentong nung nungdakhapur (ex-servicemen & dependent) nem wheelchairs - 11, walkers - 6, walking sticks - 15 aser hearing aids - 6 lema agütsü.

Sentong nung sensaksemba mapang ka liasü aser iba nung ex-servicemen aser parnok dak nentaka alirtemi ajangshiba tebilemtüsü/timtem balala den mangatetba onük balala aser parnok atema maongka aser teyari tapu balala aliba dak sentakba nung shisa lemsatepa liasü.

ALIMCO-i Kohima nung Assessment & Distribution Camp ayongzüktsü

Dimapur, Aami/June 23 (TYO): Ministry of Social Justice and Empowerment, Government of India kübok Central Public Sector Enterprise, Artificial Limbs Manufacturing Corporation of India (ALIMCO) ajanga Assistance to Disabled Persons (ADIP) Scheme aser Rashtriya Vayoshri Yojana (RVY) Scheme kübok Divyangjan (Persons with Disabilities) aser arishi küm 60 aser tema teintet rogotem atema Assessment and Distribution Camps tem Kohima district kübok subdivision balala nung agütsü, ta Deputy Commissioner, Kohima

sangdong ka ajanga ashi.

Iba camp ya July 1, 2026 nü Council Hall, Sechu Zubza nung agütsü, July 2 nü District Social Welfare Conference Hall, Kohima nung agütsü, July 3 nü CDPO Office, Chiephobozou, July 4 nü District Social Welfare Conference Hall, Kohima aser July 6 nü CDPO Office, Jakhama nung alütsü.

Temsüa aliba nisungtem iba camp nung adentsü ayongzüker, ta sangdong ajanga ashi.

ADIP Scheme atema beneficiaries temi UDID Card (mandatory) mesüra UDID enrolment number den 40 per cent aser iba dak tema temang

nung mokokmin aliba sayuba Medical Disability Certificate, Aadhaar Card, ita nung sen 22,500 tak tali mangur ta District Administration-i agütsüba Income Certificate mesüra ration card aser passport-size photographs ana bener arutsüla.

RVY Scheme atema arishi küm 60 aser tema alirtemi Aadhaar Card, ita nung sen 15,000 tak tali mangur ta District Administration-i agütsüba Income Certificate mesüra BPL ration card/proof of receiving pension aser passport-size noksa ana bener arutsüla, ta sangdong ajangasa ashi.

Mokokchung nung Census operations atema shisa agitepa senden amen

Dimapur, Aami/June 23 (TYO): Census operation aser tang tasen tenzüka aliba self-enumeration phase nung stakeholders tem shilem agidaktsütsü aser awareness tali agütsütsü atema shisa agitepa senden ka June 22, 2026 nü Deputy Commissioner, Mokokchung indang Conference Hall nung mena liasü.

Iba senden nung Deputy Commissioner, Mokokchung, Ajit Kumar Verma, IAS menden liasü aser pai linük atema sentong yanglutsü, policy yanglutsü, senotsü lemsatsü aser mapa inyaksü atema census ya database tamendak dak tongtipangtiba lir ta ashi.

Iba ya India nung digital yimya nung census mezüngbuba alütsü, koba ajanga nüburtem nem tashi agütsür aser field enumerators temi mapa tajungba nung inyaktettsü, ta ashi.

Verma-i ketdangsürtem dang data shidak bendenba nung rangloksü ajungshi aser stakeholders tem dang self-enumeration asoshi nüburtem ajungmesoa iba exercise nung yariteptsü ayongzuka liasü.

Additional Deputy Commissioner Mokokchung, Atsunga Walling ajanga master trainers, field trainers, supervisors aser enumerators atema training sentong tembanga agir aliba osang lemsatepa liasü.

House Listing phase ya July 1 nungi 31, 2026 tasji alütsü aser iba mapang tasüngdangba 33 asüngdangtsü, aser phase tanabuba - population enumeration - ya February 2027 nung tenzüksü, ta Wallingbai metetdaksü. Mokokchung district atema Charge Officers 13, Supervisors (reserve nung 10 yua aliba dena) 83 aser Enumerators 447 alütsü.

June 16 nungi 30, 2026 tashi

self-enumeration mapang indang lemsatepdang, iba mapa renema inyaksü minute pongu dang tajemba agir, ta ADC-i metetdaksü aser lenirtem dang awareness prokshitsü ayongzuka liasü.

Senior Superintendent of Police, Mokokchung, Vesupra Kezo-i iba senden nung jembidang temelaba makai 'personal information' temai madoktsütsü tekumdangtsü ashi.

Iba senden tembanga sensaksemba mapang agia liasü aser iba mapang senden nung adener temi asüngdangba DC aser ADC ajanga langzüa liasü aser self-enumeration atema live demonstration sayua liasü.

Self-enumeration ya official portal se.census.gov.in nung indang-indanga log in sür sütettsü. Tasüngdangba tem jelia https://se.census.gov.in/assets/SE_Question.pdf nungi download sütettsü.

KPC aser DPC ajanga asükhü lemsatep

Dimapur, Aami/June 23 (TYO): Kohima Press Club nung züngsem aser taoba tongti zülur Atono Tsükrü Kense adianu Vihutuo Tsükrü Hombarnü Oking Hospital, Kohima nung asüba osang angashia kanga jashir, ta KPC sangdong ka ajanga ashi.

Pa arishi küm 34 liasü aser pa kinungtsü den ita pezü kinü tanur ka yutsür süogo. Atono aser lar kinungertem den onoki asükhü lemsateper. Nü adianu den liyonga aruba bilemteta anisüngzük angutsü aser asür tanüla tesunep nung

anisüngzüktsü onoki sarasademtsür, ta KPC ajanga ashi.

Kohima Press Club züngsem aser taoba general secretary Atono Tsükrü Kense adianu June 22 nü Oking Hospital Kohima nung asüba osang angashia temulung shiranger, ta Dimapur Press Club sangdong ka nung ashi.

Onoki Atono aser mangyimer kibong den asükhü lemsateper aser pa tanüla tesunep nung anisüngzükjang ta sarasademtsür, ta DPC sangdong ajangasa ashi.

ICIT Mokokchung nungjamelener

Dimapur, Aami/June 23 (TYO): Cabinet-i telemetba agiba ama iba sangdong adoktsüba anogo nungi Institute of Communication & Information Technology (ICIT), Mokokchung nungja melenshia Government Polytechnic, Mokokchung ta, ta Higher & Technical Education Department, Nagaland ajanga

Mongulbarnü sangdong ka nung metetdaksüogo.

Tenüng melenshiba ya official inyakyim aser administrative inyaksangshi ajunga anung amshitsü, anungji Departments aser establishments ajunga dang nungdakba mera agütsü ayongzüker, ta sangdong ajanga ashi.

Küm 10 sülen Nagaland nung IAF Agniveervayu rally ayongzüktsü

Dimapur, Aami/June 23 (TYO): Nagaland nung Indian Air Force indang Agniveervayu scheme atema Open Recruitment Rally ka September 2026 nung ayongzüktsü, koba küm ter sülen tang mezüngbuba alütsü. Iba telemetba ya Special Secretary (Home) lenisüba kübok June 10 nü Conference Room, Principal Secretary (Home), Kohima nung senden ka amenba mapang agia liasü. Iba senden nung Home Department aser tanga tongtipang department tem nungi ketdangsürtem adenshia iba recruitment drive asoshi sentong yanglua liasü.

Parnoki tatsü-talang asadanga jembiba sülen rally ya Nagaland Armed Police Training Centre (NAPTC), Chümoukedima nung agütsü telemetba agia liasü.

Kasa senden nung iba rally tajungtiba nung ayongzuka agitetsü asoshi department shia mapa nungloksü liasü.

Police Headquarters dang IAF ketdangsürtem den osangtsüsang agitepa inyaksü asoshi 1st NAP nungi Nodal Officer ka shimtsü nungloksü aser Commissioner's Office dang rally mapang administrative teyari agütsütsü asoshi Deputy Commissioner, Chümoukedima tuyutsü mepishia liasü.

Iba senden nung Special Secretary (Home) ajanga senden nung adenerem pela agizük aser Wing Commander A. Muralidharan, Commanding Officer, Indian Air Force aser pa den külem tenzükertem dang pelaba lemsatepa liasü.

Wing Commander-i Agniveer Scheme nung tajangzük alibatem lemsatep aser Nagaland aser tanga Northeastern states nungi lanurtemi awareness maliba ajanga item maongka ajak magiteti aruogo ta ashi. Pai iba rally ya Agniveervayu (Non-Technical) category kübok tetsür aser tebur atema alütsü ta metetdaksü.

Nagaland nung IAF ajanga recruitment rally ya küm ter sülen ayongzüker, ta pai metetdaksü aser state sorkar dang officers 5 nungi 7 tsüngta aser Warrant Officers aser Senior Non-Commissioned Officers 70 shi atema gari aser tanendak tesemtem densema akokba lenmang nung yariteptsü mepishia liasü.

Rally mapang Health & Family Welfare Department ajanga doctor anati anir medical team ka den ambulance yoktsü, School Education Department-i District Education Officer, Chümoukedima ajanga tesayur pezü candidate indang documents jangjatepba nung yaritsü asoshi yoktsü.

Rally mapang transportations atema Home Department-i PHQ den teka amteper inyaksü aser Department of Information & Public Relations (DIPR) ajanga state nung aliba district ajunga nung iba rally indang osangtsüsang sapang balala nung prokshitsü nungloksü.

Inspector General, Fire Services dang iba rally mapang exigent duties ama fire tender ka yoktsü mepishia liasü.

Rally agütsü anogo 45 shi lia Indian Air Force ajanga eligibility criteria aser tanga nungdakhatem tejangja keter recruitment advertisement agütsütsü senden nungsa lemteta liasü.



National Security Adviser Ajit Doval, Iran Supreme National Security Council (SNSC) Deputy Secretary for Defence Affairs Ghadir Nezamipour, China Foreign Affairs Minister Wang Yi, UAE Secretary-General of the Supreme National Security Council Ali Mohammed Hammad Al Shamsi aser tanga lenirtem New Delhi nung BRICS National Security Advisers' senden amenba mapang tangokba noksa nung angur.

India-Japan Summit Assam nung masü Delhi nung agitsü

New Delhi, Aami/June 23 (Agencies): India-Japan Summit Assam nung agitsü sentong liasü, saka Japan PM mapang maliba aser tanga logistic ken o kar aliba ajanga New Delhi nung agitsüsa kümogo, ta ken o jangja alirtemi Mongolbarnü metetdaksü.

Japan Ato Kilonser Sanae Takaichi-i tang mezügbuba July 1 nungi 3 tashi India semdanga PM Modi den senden ka amentsü. Hombarnü tashi nung senden ya Guwahati nung agitsü sentong yanglua liasü, saka tang sentong melenshiogo.

Takaichi linük nung Diet or Japan's Parliament session densema tanga maparen aliba ajanga La India-i arur aotsüba mapang ya kanga petdaka akümba yong sentong melenshitsüsa aküm, ta kasa sangdong ajanga metetdaksü.

"Linük yimtiba nungi pilar tanga logistic ken o tem kar aliba ajanga senden ya New Delhi nung dang agitsü imlar," ta source kati ashi.

Chief minister Himanta Biswa Sarma-i anir Assam sorkar Japan PM agizüksü atema renema liasü, kong July 1 nü Guwahati nung PM ana atema roadshow ka ayongzüka agitsüba densema liasü. Iba senden ya Guwahati tezülen five-star resort ka nung agitsü atema renema liasü.

Takaichi meina shishilembaba tsütsü lenir 50 arutsü. Senden nung economic security, resilient supply chains, semiconductors, critical minerals, defence, technology aser Ahmedabad-Mumbai high speed railway project amala onüktem benoka sensaksak asemtsü imlar.

North East state tem terenlok atema Japan kija-i India den tenangzüktepba yanglur lir aser Tokyo-i Arunachal Pradesh daka alaka iba tesem nung terenlok maparen balala atema sen crore 1,600 dak tema agitsüogo.

Iba senden ya mezüngbo Guwahati nung 2019 küm December ita agitsü liasü, saka Citizenship (Amendment) Act dak sendakba nung Assam nung longkak aitba ajanga athi.

2025 küm Tokyo nung tatembanbuba summit amenba mapang linük ana yagi India nung küm ter tsüngda private investments atema yen trillion ter entoktsü nükjidong ayu. Iba ya technology dak sendakba nung rongsenketzüng nung tesendaktep, digitalisation aser rare earths atema liasü.

TMC-i Firhad Hakim, Arup Roy aser tangar 6 mintok

New Delhi, Aami/June 23 (Agencies): Trinamool Congress (TMC)-i Mongolbarnü Firhad Hakim aser Arup Roy na densema lenir tejen ti mintokogo. Party anemba telok nung adenba sülen parok ya mintoka liasü.

Party nungi mintokertem rongnung Javed Ahmed Khan, Firhad Hakim, Arup Roy, Rathin Ghosh, Biplab Mitra, Sabina Yasmin, Aroop Biswas aser Snehasis Chakraborty nung densema lir, ta ANI news agency-i metetdaksü.

Mongolbarnü All India Trinamool Congress (AITC)-i item lenirtem nem show-cause notices agütsü aser party anema inyaksangshiba atema parnok aitsü.

Committee (NWC) ka tenteta liasü.

Hombarnü osangbenertem den sensaksema mapang Ritabrata Banerjee-i ashiba agi, special session ka agiba mapang züngsem ajaki Arup Roy ya mendenbuba asütsü shim. Iba senden nung party delegate temi shilem agia liasü.

"All India Trinamool Congress party special session ka tanü agiogo. Senden nung delegate tem election agiba sülen All India Trinamool Congress Committee aser NWC tentetogo.

"Arup Roy All India Trinamool Congress mendenbuba asütsü shimogo," ta pai ashi.

Iba telok yagisa, taoba minister Aroop Biswas aser MLA Firhad Hakim na vice-chairperson asütsü shimogo. Banerjee-i ashiba agi, züngsem 30 agi kümtetba committee nung Firhad Hakim, Arup Biswas, Rathin Ghosh, Sabina Yasmin, Javed Khan, Sandipan Saha aser tangartem densema lir.

Party-isa, West Bengal Assembly nung Firhad Hakim Chief Whip aliba melenogo. Hombar aonung TMC-i Assembly Speaker Biman Banerjee dangi Chief Whip asütsü asoshi MLA Madan Mitra nominate asüba shiti ka yok.

Mongolbarnü iba shiti indang hard copy ka agütsütsü asoshi TMC lenir Sovandeb Chattopadhyay-i Speaker indang office semdang, saka office-i iba shiti magizük aser ashiba agi, ken o ya "sub-judice" ka lir.

West Bengal nung Leader of Opposition Ritabrata Banerjee-i aniba party anemba teloki party parallel leadership structure ka sangdongba sülen anogo ka lir iba ya atalokogo.

Iba telok yagi Arup Roy ya All India Trinamool Congress indang mendenbuba asütsü shim aser züngsem 30 agi kümtetba National Working

den sensaksema mapang Ritabrata Banerjee-i ashiba agi, special session ka agiba mapang züngsem ajaki Arup Roy ya mendenbuba asütsü shim. Iba senden nung party delegate temi shilem agia liasü.

"All India Trinamool Congress party special session ka tanü agiogo. Senden nung delegate tem election agiba sülen All India Trinamool Congress Committee aser NWC tentetogo.

"Arup Roy All India Trinamool Congress mendenbuba asütsü shimogo," ta pai ashi.

Iba telok yagisa, taoba minister Aroop Biswas aser MLA Firhad Hakim na vice-chairperson asütsü shimogo. Banerjee-i ashiba agi, züngsem 30 agi kümtetba committee nung Firhad Hakim, Arup Biswas, Rathin Ghosh, Sabina Yasmin, Javed Khan, Sandipan Saha aser tangartem densema lir.

Party-isa, West Bengal Assembly nung Firhad Hakim Chief Whip aliba melenogo. Hombar aonung TMC-i Assembly Speaker Biman Banerjee dangi Chief Whip asütsü asoshi MLA Madan Mitra nominate asüba shiti ka yok.

Mongolbarnü iba shiti indang hard copy ka agütsütsü asoshi TMC lenir Sovandeb Chattopadhyay-i Speaker indang office semdang, saka office-i iba shiti magizük aser ashiba agi, ken o ya "sub-judice" ka lir.

West Bengal nung Leader of Opposition Ritabrata Banerjee-i aniba party anemba teloki party parallel leadership structure ka sangdongba sülen anogo ka lir iba ya atalokogo.

Iba telok yagi Arup Roy ya All India Trinamool Congress indang mendenbuba asütsü shim aser züngsem 30 agi kümtetba National Working

Tamil Nadu ammonia gas leak asüba lendong nung asür 9 jungogo

New Delhi, Aami/June 23 (Agencies): Tamil Nadu kübok Tiruvallur district nung ammonia gas leak asüba lendong nung asür nisung teku jungogo, ta state sorkari Mongolbarnü metetdaksü.

Health department sangdong ka ajanga ashiba agi, asürtem ya ajak tetsürtem dang liasü. Asürtem ya Odisha nungi Shibani, Jumanı Juang, Geetha

Juanga, Purnima Juanga, Champabati Juanga, Parbavathi Juanga, aser Assam nungi Sita Hasda aser Anjila Soren na ta jangjaogo.

"June 23 nü tashi nung asür teku ajungba metetdaksüogo," ta kasa sangdong ajanga metetdaksü.

Department-i ashiba agi, ammonia saokba agi kongshirtem dak tangula junga

mesashitetba, tenük mesepba aser respiratory tract mesakba, aketba, teku nung minprong aliba amala symptom tem nguogo.

"Iba lendong ya kodaser atok aji tejangja metettsü atema ken o dak sendaka aliba ketdangsürtemi bushisüngdang südar," ta sorkari ashi.

June 21 nü Tiruvallur district nung Periyapalayam anasa Kannigaipair-Manjungarai nung nija seafood processing aser exports unit ka nung teti ama inyaksangshiba mapang iba chemical ya leak süa liasü.

Health department ketdangsürtemi ashiba agi, iba lendong yagi nisung 80 kongshiogo. Parnok rongnung nisung 69 maneni temang anepaludar aser nisung ana mozüki nungi yokogo.

Health department-i tensa maneni asadangdar aser lendong agi kongshir alir ajak nem takok tashi medical teyari agütsütsü asoshi jenjang agidar.

Chief minister C Joseph Vijay-i, Industrial Safety and Health director, Pollution Control Board member secretary aser Public Health additional director nungeri kümtetba committee kati iba tesem semdanga ghonda 24 tsüngda osang ka agütsütsü tetuyuba agüja liasü.

पावरग्रिड
POWERGRID

METETDAKSÜR

North Eastern tesem nung 2019-24 atema Transmission tariff truing up aser RTUs melentsü atema 2024-29 Tariff block asoshi Transmission tariff determination atema temepishiba..

1. Temalen shisema aliba Transmission system beneficiaries temji: (a) Assam Power Distribution Company Limited (b) Meghalaya Power Distribution Company Limited (c) Government of Arunachal Pradesh (d) Power and Electricity Department, Mizoram (f) Electricity Dept. of Puducherry (g) DOP, Nagaland (h) TSECL.

2. Tariff indang osang tejangja:

a) 2019-24 Block ₹ in Lakhs

Asset detail	DOC	Completion Cost as on 31.03.2024		2019-20	2020-21	2021-22	2022-23	2023-24
Asset-1	01.02.2024	216.96	AFC based on truing up	--	--	--	--	9.28

b) 2024-29 Block ₹ in Lakhs

Asset detail	Completion Cost as on 31.03.2029		2024-25	2025-26	2026-27	2027-28	2028-29
Asset-1	235.25	AFC	60.37	60.22	59.96	57.25	55.04

4. Tariff determination atema application copy ka applicant indang website www.powergrid.in nung enokja lir.

5. Petition nung keta aliba tariff determination atema benoker aliba nung ken o kar benokdangtsü mesüra tashishitsü lira beneficiaries densema nisung mashi kati Commission indang e-filing portal mesüra Secretary, Central Electricity Regulatory Commission, 6th, 7th & 8th floor, Tower B, World Trade Centre, Naorji Nagar, New Delhi-110029 (or other address where the office of the Commission is situated), dangi shiti zülutettsü. Shiti den külemi petitioner indang copy ka den osang agütsüba sülen anogo 30 tsüngda corporate office nung benoktsüla.

Place : GURUGRAM **Sd/-**
Date : 24.06.2026 **Sr. General Manager (Commercial)**

POWER GRID CORPORATION OF INDIA LIMITED
(A Government of India Enterprise)

Corp. Office : "Saudamini", Plot No. 2, Sector-29, Gurugram-122001, (Haryana) Tel. : 0124-2571700-719
Reg. Office : B-9, Qutab Institutional Area, New Delhi-110 016. Tel : 011-26560112, 26560121
www.powergrid.in, CIN : L40101DL1989GOI038121

A Maharatna PSU



Jointness, Atmanirbharta and Innovation (JAI) initiative kübok Indian Army aser Zoho Corporation na tsüngda tenangzüktepba ka nung sign asüba mapang Director General of Information Systems (DG IS) Lieutenant General Harsh Chhibber, Zoho Corporation Director of Engineering Rajendran Dandapani aser tanga lenirtem den Chief of the Army Staff (COAS) General Upendra Dwivedi tangokba noksa nung angur.



TIR YIMYIM YIMOBILEM (EDITRIAL)

DIMAPUR WEDNESDAY, JUNE (AAMI) 24, 2026

Trinamool Congress loksago

- P Tiamongba Aier

Mamata Banerjee-i aniba Trinamool Congress (TMC) ajanga kum 15 tashi atongtepa West Bengal madak yimsu sua aru saka tanu TMC loksaa aotsusa mapang ka ajurua lir. April 2026 State Assembly elections nung Bharatiya Janata Party (BJP) tsungdang tamakok anguba sülen founder-President Mamata Banerjee aser General Secretary Abhishek Banerjee na den TMC MLA ishika dang anunga lir. Arishi kum 71 tain Mamata-i tang Kolkata aser New Delhi ta tongpang ana rarar. June 3, 2026 nu West Bengal nung TMC MLA 80 nungi parnok 58-i la anema noktak aser iba ya mazüoktet lia June 8, 2026 nu TMC MP Kakoli Ghosh Dastidar-i anir Lok Sabha MP 28 nungi 20-i parnok telok balaka razuka orr Bharatiya Janata Party (BJP)-i aniba National Democratic Alliance (NDA) nungittsu ta noktak. Iba sülen TMC nungi Rajya Sabha MP aseme menden toktsu. India nüjiso ngur Congress aser Communist Party of India (Marxist)-i aniba Left Front ajanga West Bengal madak melentepa yimsu sua arur 2011 nungi local party Trinamool Congress (TMC)-i yimsu asutsu tenzük. TMC ya Mamata Banerjee-i anir 1998 nung Congress nungi razuka orr tentetba telok ka lir. Takum May 4 tashi TMC-i West Bengal madak yimsu sua aru, ajisuka Congress aser CPI (M) ama TMC-ia tashi alia amshiba den sorkar ketdangsubaren ajanga nubortem aziuka aru. Item inyakyim ajanga April 2026 assembly elections nung TMC-i BJP tsungdang tamakok angu. Hao, ashishitep aketba Special Intensive Revision (SIR) ajanga voter list nungi nisung lakh 91 tenung agenba ajanga Mamata pusemertem aika sama. Ajisuka Centre nung BJP-i aniba sorkari investigative agencies ajanga TMC lennir aika timtemdaksu. Külen, Mamata-i kum 15 tashi BJP anemba Congress aser CPI(M) teloktem mezüngoki aruba ajanga takum elections nung BJP den tokteper la kija dang akum. Nubortemi imlaba ama BJP-i State Assembly nung menden 294 nungi 208 nung takok ngua sorkar kumogo. BJP-i takok ngua sorkar akumba mapang TMC lennirtem külemi longjemshitsü melena Kolkata aser New Delhi nung lennirtem aser züngsemtem tsübutepa Mamata anema noktaksu tenzük. West Bengal nung BJP Chief Minister Suvendu Adhikari ya tesüiba nung TMC nung Mamata den teyariteper tajung ka liasü aser pai Mamata jenjang mejungi kümdaktsüsu atema sentong atonga inyaktsu tenzük. Sorkar tasen akumba sülen West Bengal nung TMC lennirtem anema ken o tem benok, teloktem ajungmesoa TMC lennirtem mezügmeshitsü tenzük aser item tatalokba mekotteti lennir aika BJP tsütsü ashitsüsa akum. TMC nung temulung masürtemi Mamata anema masu saka lar kinunger aser General Secretary Abhishek Banerjee anema tongti sua noktaker. Abhishek-i 2021 nungi tenzuka tashi balaka amshiba dang masu saka Mamata den külemi tenzuka arurtem yutsur tanga nisungtem shimteter party ketdangsu aru. TMC nung temulung masürtemi Mamata ya parnok "Advisor" ama asutsu mulunga lir saka lar kinunger Abhishek khenyongi magizüker. Külen, Mamata den külemi noktaktertem aser la pusemertemibo chichiba züngsem masürtemi party toktsur aoba ya junger. Tebilemba tamajung alirtem ogo aser tesüiba dang nungi party tang jenjang tajungba kumogo ta parnoki ashir. Mamata pusemer TMC MP Mohua Moitra-i temulung masürtemi BJP sorkar tashiyim tsübur aser parnok ya tangatetba shitak malirtem lir ta shiogo. Temulung masürtemi ita ka tejakdang Mamata tenung amshia election nung takok angu saka BJP tsungdang tamakok anguba sülen parnok temulung ila kümer la anemtsu tenzük. Iba ya BJP-i reshikangshitsü tsübuba ajanga lir aser ajak dang tongtipangbaji voter temi parnok TMC atema inyaktsu shimba ashioktüsügo ta Moitra-isa shiogo. Mamata ya rarar ka lir aser ni takum ali tashi la den külemi noktaksu aser BJP den tokteptsu ta laisa shiogo. BJP-i parnok taginübatem atongsu atema tasa ka renema lir. BJP-i temulung masüba TMC MLA tem party nung anioktsu kangabo jangraa mali. BJP-i TMC nung temulung masürtem ya parliament nung Telugu Desam Party aser Janata Dal United ama timtem agütsüba teloktem madak tajangzük angutsu atema amshitsü akok ta taoba mapang sorkar ketdangsur aser ex-TMC MP Jawahar Sircar-ibo ashir. BJP-i ashishitep aketba bill aser constitutional amendments agizüksu atema temulung masüba TMC MP tem amshitsü. Iba melena temulung masüba TMC telok nung züngsemtemi bushisungdang nungi jenbutsu ta Mamata pusemer TMC MP Kirti Azad-ibo ashir. Tang tesüsabuba tatalokbaji Trinamool Congress (TMC) nung temulung masüba teloki June 22, 2026 nu party chairperson Mamata Banerjee melena MLA Arup Roy shimba osang lir aser iba ya ozüngi melaba ama inyak asu masu okadaki dang obendang ka agütsüsu. India nung yimtenren asadangertemi ashiba agi BJP-i sorkar tashi amshia yimsu sua aotsu atema national party tem dang masu saka regional party tem-a tashimait kümdaktsüsu tasa atonga inyaker aser ibaji tang West Bengal nung atalokba ajanga kuli tejangja sayur ama bilemer. Iba ya shitak süra kobi melii India ya China aser Russia ama party ka dang yimsu asüba linük ka akümstu ana nung lir aser BJP-i kanga aginüba ama India nung election ajunga mapang ka nung dang külemi agia aotsu.

OLEMSABANG

YI AJEMBA AJANGA TAJANGZÜK ANGUBA, ASER TAKOKSA DEN TERAкса BENER ARUTSÜBA INDANG TATSÜ AGI LEMSATEPER

~ R. Imkong Lkr, Aolijen Mepu, Near C.T.C, Mokochung

Yi ajemba ya asen tetsü-tebou mapang nungi asen lima nung pei sasa yi mozü nguteta chi agisa yanglua chia jema aru ta asen Aor tar nunger otsü ajanga angazuka aru. Aji oda iba chiyungtsü chia jema aruba ajanga tensa mapang ajak tizükteta liyonga aru ta otsü nungi angazuka aru; tongtibangsa asen tetsü-teboutem mapang nung arürtem (Enemies) den leptepe-tsüngtep mapang asünungji konang nüngsang bushitepa liyonga arudang pei tepok asüngtsü atema alu yima aru. Iba tensa mapang nungji alu wadang nung meranga inyaker külen aya tzüra nung alu jen (Farm House) bushia arua tatsuka anisüngzüka alitang alu meketaji Arür kener tetezü mangko bushirtem (Head Hunter) anasa arua ali mali repringshima alidang, kinüngtsü-i (House-wife) yakta tang piya chi aser mejemtzu tu bener arua chia jemdaksüba ajanga temang nung tashi tasen nguasa liasü. Iba sülen ano tanaben alu wadang jagisa oa meranga inyaker külen Anü ai den külemi alu wadang nungjagi jen tu (Farm House) bushia arua kasa piya chi tu Lalok ka (A kind of filter) nung tilaka enoka tzü den meyoktepa ajepsa senzuka jemer külen jentang tu paknu ka (A small mat) lema yur yangji sü-a mapeni ondakasa mejanga aru, (sleeping without clothes). Idangji aonung ammanng piyong merila (Mosquitoes) aika arua temang nung meteper, saka parnok meshiranger, kechiba ta süra parnok temang telong nungji yi mozü peria aliba ajanga merilai Miim (Poison) enoka doktsur oaka parnokji kodanga meshirangisa liasü ta jembia aru. Yamaji asen tetsü-teboutem tashidak tapu aika nungi kumzüka liyonga aru ta otsü-i ashir.

Tanapuba nung yi ajemba ajanga takoksa den teraksa bener arutsüba indang tatsü agi lemsateper. Mezünpuba nung tanu asen lima nung yi tapu aika anguba yagibo asen temang rangpen raksatsur ta metettsüla. Saka asen tetsü-tebou mapang nungi asen tsuraburtem mapang tashi nung yi yanglua jema aruba yi yabo chi nung "Enügra mozü" enoka yangluba yi hia jema aru ta angatetdaksuner, aser iba yi ajemba jagibo asen temang nung tashidak tapu aika nungi kumzüka liasa aru ta angazuka aru. Saka tanüasen lima nung anguba yitem yabo mekümdangra lendong tulu keta lir ta metettsüla, item yitemji yamai lir, XXX-RUM, Whisky, Brandy, Macdowell, Royal Stag, Royal King, Beer, aser ano tanga yi tapu aikasa lir. Itemji chia ahemba ajemba ajanga asen temang nung 90% bo teraksa aser takoksa tang bener arutsur ta metetsümonga, tulurtem, takartem aser ano tanu poksung aayanga alirtem aikati item yiji bushia jemteper. Aji oda tanu mapang yi jemertemi ashiba agi XXX-RUM tetezüji "Regular used medicine" ta tenung agütsur, saka iba mozü ya tanen makai teti tang jema aliba jagi asen temang atema mozü masü, saka mi-im (Poison) ang kümdaktsur. Yamaji yijemer aika takum arishi (Life Longevity) yakta tang tembanga aruba angur, aser ano aikasa tembangtsü anendaka lir ta metetdi. Kechiba ta süra yi ajemba ajanga asen temang nung aliba shi-azü tajung ajak rongrepa ronger, iba jagi tatem nungbo pei temang nung timtem tapu aika adoker aser meküzmükteti asu limai oadoktsüsa akümer, koda tesasatsü tulu ataloker. Aji oda Tsüngremi nisung ka takümüji alima nung alidang jangratema teinyaktsü aika inyaka lir külen, tatem nung junga alirtem asoshiho Kodaki (Heaven) atutsü nükjidong nung iba lima yagi yok ta Temeshi Lai nung shia angur. Saka nisungtem ya temenen nisungtem asünungji, iba lima nung tatsuka liyonga aodang pei sünütsü sua, pei inyaknütsü inyaka liyonga aor, aser mapa tamajungtem nung aiben atongsema inyaka atar, yamaji aikati yi chia jemer yiar (Foolish) akümer aser medemer o medemer na tsüngda nung mangatetep adoka parnok o parnok na tsüngda nung raratep adokdang takümtem aika samaogo, aser ano iba denji ali rongsen-a aikasa lalushibonga endoker aser medemer o medemer na tsüngda nung teti atema tsükchitepa akumba ngua arudagi. Aji oda yi ajemba ajanga konang nüngsang bener arubabo angashia maruka, saka tesama den takoksa tang ajangshia aruba ngua arudagi.

Tasempuba nung yangi ano tatishitsü otsü ka yamai atalokba lemsatepner. Khen mapang ka takar nisungka liasü, pa ya temetetba aser tazüngba nunga B.A degree anguba nübu ka liasü. Pa takümüji liyonga aotang pai inyakba maparen tapu ajak nung kanga azükarua takarba nisung ka aküm. Yamaji liyonga arudang kenü anogo par medemer tajung ka nungi birthday party ka nung adentsü atema invitation card ka angu, anungji pai iba atemaji senpet tajung ka alia ayu aser iba anogoji donga arudang pai yangji oa dena liasü. Iba anogo nungji taoba mapang nung par akhi medemertem kar ajurua party nungji pelatepa chia ajemtang yangji yi tajungla tu aika jangratema chia jema longsotep. Iba sülen tubo pai iba yi tu mapang shia alia jemasa liasü, aser oda odabo pa tu yi jemer nisung ka aküm, aser pai yi tu tanen makai jema jemabo sensak tia iadok, aser tatem nungbo pa ya meshimetsur takum ka kümadok ta otsü jagi ashir. Aji oda yi ajemba ajanga nisung ka takümüji tanem tanemi tang takum rangpenji meyoka atoker ta angateter, anungji mezüngyongi yi nungji mekongshi tajungba ta metetdi.

Yamajisa Tejen Lai mapang nunga yi ajemba ajanga maaksü den teraksa bener arutsüba indang tatishitsüka yangi shisemer. Alemlai Tejen Lai putu mapang nung tzümetsüng (Flood) sülen temeshi nisung Noa-i tsükmenatsü lu ka yima iba nung jagi pai yi yanglua ajemba ajanga mesüpadok, aser mangsa (naked) sür süki nung mejanga liasü ta shia angur. Saka pai pa mangsa ta memeteti maaksü nung liasü ta Lipok tapu 9:21 nungji shia angur. Ano Herod chubai pa asoba anogo donga arudang benjong tuluka ayongzük, aser yangji chuba jamitem kanga sentsüwangshia yi jemtepa alidang Herodia jalai chuba kanga peladakja meraketdakja tsüngsanga sayu. Anungji chubai jala tang ashi, oda nai kechisa aginüa asüngdangdir ni aji agütsüsu mulunga lir ta shia jala tangji oda kü yimli tesadang ka tashia agütsüsu mulunga lir ta par chuba jamitem matsüngdang nangzüka liasü. Kodang Herodia-i iba oji angashi, lai lar jalai jar ashi, oda chubai nangzüka amaji nai auso ka nung Yohan Baptitsüba kolak meshiang ta shir yok. Anungji jalai chuba dangi oa iba oji ashi, idangji chubaji kanga aoksadok aser pa kanga timtemdaksü. Saka chuba kati par jamitem, tamarenertem mena lia nangzüka oji raksatsü mekoki chubai par sepai tanüker ka yoka Baptitsüba Yohan tsüngden chiokdak puoka lia pa kolakji tangdaksü, aser ibaji bener arua jala nemji auso ka nung agütsü. Mathi tapu 14:6-11 nungji iba tatalokbaji shia angur.

Yamaji yi ajemba ajanga maaksü tulu den shisabulu tulu oda khen agi meyanglushitetba teraksa aser tejashi bener arutsur ta angateter. Yamaji tanu mapang nunga yi ajemba ajanga kibong ka sensak tia ajuruba den apunina tsüngda nung mangatetep tulu adoka balalulaba angashia aruogo. Aser kodang apunina balaba atalokdir parnok chirtem tiaji aiatai tia nung doktsur ta angateter.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Central Nigeria nung Fulani kiralongrar-i tamanger 20 tepset

Abuja, Aami/June 23 (Agencies): Fulani shiruru metsürtemi June 22, 2026 anepdang Plateau state, Nigeria nung amakdang Khristanpur par 20 dak tema tepset ta osangtem ajanga ashir.

Lendong agütsürtem yagi anepdang 2:00 ako meta Khristanpur timba aliba Kawel village, Bokkos County amak, ta yangji alir Dorcas Ishaya-i osangbener dang ashir.

"Fulani nisungtemi anepdang 2 ako meta Mushere area nung Kawel tesem amak, Khristanpur 20 dak tema tepset aser aika yirutsü," ta Ishaya-i ashir.

Yangji alir Tongret Ezekiel-i ashiba agi, Fulani kiralongrar temi Mushere District amakba sülen Nigerian security personnel nem osang agütsü saka anü madok tashi parnok nungi telangzüba maru.

"Tang parnok arua lir aser parnok atema tebilemtsü tulutibaji kiralongrar temi tepsetba tasü mang bener

aotsüba ya lir. Nigeria ketdangsür temi Khristanpur aser parnok rongsen kumzüka meyuteter aser tang parnok takum alir masü sür aliba nung ang temulung tali agütsür ama ajiteter," ta Ezekiel-i ashir.

"Imlibilema, Nigeria sorkari onok yutsür aotsüla aser onok tesunep nung mang yima ozü adianurtem ali nung remdaksütsüla. Ammang ka nung Khristanpur 20 dak tema tepset. Ibai temulung shirangtsü, taoksatsü aser temulung agi agizüksü makokba tejashi lir."

June 16 nü Fulani kiralongrar temi Bokkos County nung atsüka atar Khristan lenir aser District Head of Gwande District, Samuel Alaket tepset, ta Bokkos Local Government Traditional Council ajanga ashir.

"District Head of Gwande, Saf Samuel Alaket ya traditional council indang senden ka nung dener par yimtsüngi meyipa aodang

Fulani kiralongrar temi Sha-Gwande Road nung atsüka atar khaset," ta council ajanga sangdong ka nung ashir.

"Iba lendong atalokba yagi Bokkos Khristanpur tali mang ayimer aser tebilemtsü akar. Pa tanüla asoshi onoki sarasademtsür aser par kinunger, Gwande District, Bokkos Traditional Council aser Bokkos nung aliba nübur ajunga den asükhü lemsar."

October 1, 2024 nungi September 30, 2025 tsüngta Nigeria nung Khristanpur tepsetba ama kecha linük nunga Khristanpur tepseta mali, ta Open Doors indang 2026 World Watch List ajanga ashir. Iba mapang alima nung tamangba yimsü mechi Khristanpur 4,849 tepsetba nungi nisung 3,490 (shilem 72) Nigeria nunger lir, kong taoba küm nisung 3,100 tepseta liasü. Alima nung Khristanpur alitsü linük tamajungtiba 50 nung Nigeria ya jenjang 7 buba nung lir ta WWL ajanga ashir.

Kerala nungyi indang tax ajemtsü sentong anema arogo nokdaker



Thiruvananthapuram, Aami/June 23 (Agencies): Kerala state nung Catholic bishops temi tang tasen kumteta aliba sorkar dang alcohol ajema aliba tajemtsü nung taxes tesadang ka dak tali ajemtsü telemtetba agia aliba agentsü ayongzüker aser ibai nüburtem nem osang tai agütsür ta ashir.

June 19 nü state legislature nung mezüngbuba budget benokdang, Congress-i aniba United Democratic Front (UDF) sorkari tang alcohol tax shilem 251 meshia aliba nungi shilem 50 dak tema ajemtsü sentong lir ta ashir.

Sorkari 0-10 percent alcohol aliba tajemtsü nung taxes shilem 120 meshitsü aser 10-20 percent aliba nung taxes shilem 175 meshitsü sentong lir, ta Chief Minister VD Satheeshan, shiba finance minister lir, pai ashir.

Iba telemtetba ya par party nungia züngsem kari magizük aser Catholic Church aser opposition party temia tasenba yagi lanurtem ajangzüka dang timtem ang tali agütsütsü ta ashir.

June 20 nü sangdong ka nung Bishop Remigiose Inchananiyil of Thamarassery diocese ajanga iba telemtetba melenshitsü ajungshi aser iba

yagi ajanga tebilemtsü agütsüba state ka nung yi ajemtsü ajungshir ta ashir.

Mahatma Gandhi tesayuba nung azüita aliba party kati iba ama mera agitsü ya khenyongi meshidak, ta parnoki ashir.

Tax ajemba ajanga state nung yi ajemba tebilemtsü tamajungba akumtsü akok, kong temesepba mozü achiba tebilemtsü agi sünger lir.

"Iba yagi Kerala ya temesepba mozü maliba state ka kumdaksütsü nükjidong tulu aliba nung aoksa tebilemtsü tuluba kumdaksütsü," ta parnoki June 20 sangdong nung ashir.

Kerala Catholic Bishops' Council indang Temperance Commission ajanga sangdong ka nung, sorkari iba mera agiba ya lanurtem yi ajemtsü ajungmesor ama lir, ta ashir. Iba Commission yagi state nung temesepba mozü anema advocacy aser awareness campaigns ayongzüka arur.

"Liquor policy tasenba ya yi jema alirtem atema masü saka yijemer tasen adokdaksütsü atema lir, parnok tashi mait ajiteta meshi lenmangi anitsü aser sorkar asoshi senotsü arutsü," ta ashir.

Taoba chief minister aser tang opposition lenir Pinarayi Vijayan-i iba telemtetba nung

temulung melemteter aser yi yangluba company temi ayoktsü tejangraba ajanga iba mera ya agir ta ashir.

"Market nung jenjang talangba agi yi talubosa angudang yijemer tali akumtsü," ta Vijayan-i ashir.

Taoba state Congress tir M. Sudheeran-ia yimjak nung par sorkar indang liquor policy anema nokdaker.

Pai chief minister dangi shiti ka züluba nung alcohol ajema aliba tajemtsü ayokba ajungmesotsü nükjidong nung budget yanglua aliba agentsüla, ta ashir.

Tang tesüsa 2023-24 National Family Health Survey (NFHS) ajanga Kerala nung tebur pezü nungi ka yi ajemer ta bushitet.

Teburtem yi ajemba ya 2019-20 den medemdangra shilem 14 agi timba kumogo ta report ajanga ashir.

Taoba ita sayaba report nung Kerala nunger tebur arishi küm 15 aser tema shilem 22.7 yi ajemer, koba 2019-20 nung 19.9 liasü aser ibai national average shilem 18.9 dang temaba lir, ta The New Indian express nung osang ka ajanga ashir.

Kerala nung tetsür temi yi ajemba ya shilem 0.3 lir, koba 2019-20 nung 0.2 liasü.

ANOGO ABEN TSÜNGREM DEN

Tenüki manguba dak rangloker

Kibuba bushiang, aser nenok taküm alitsü.

(Amos 5: 6)

Tekülem ajanga temoatsü anguba indang nüburtemi angatetdaksütsü asoshi Amosi lenmang balala ajanga kanga merang. Pai ajeb, "Kibuba bushiang, aser nenok taküm alitsü" (Amos 5:6). Temaba nung rangloker külemba ajanga takum nung temoatsü aser takokba angur ta Amosi amang.

Asüngteta aliba takümüji kanga tashi tait, kechiaser parnok tekülem nung kanga takang. Pei tejangraba atena oa nukjidong ka ayutsü nüngdaker, ibaji pei taküm kümzüktsü asoshi, ibai ta kulemba ajanga lapokdaksür. Kodang temaba nung alibatem dak rangloker külemdir, idangji tepela tulutibaji ajangshir. Tenyar Pauli ashir, "Alima nung aliba oset nung masü, temalen aliba oset nung nenok temulung yuang." (Kol. 3 :2). Akumli wadang inyaktsü asoshi kodang tanela tashi bushia inyakdir taküm tali tetezü akar. Kibuba temoatsüji shirnoki pa shisatsü aser tashi ain bushidir, parnok den alitsü, anungji tekülem ajanga asenoki Kibuba bushidi, aser takum lidi. "Kibuba ngutettsüsa alidang pa bushiang, pa anasa alidang nenoki Pa jaang" (Isaia 55:6).

Vietnam putir meshitetba sentong nung nisung 70,000 shi adentsü

Hanoi, Aami/June 23 (Agencies): Tamangba yimsü mechi 1946 küm tepsetsang Father Francis Xavier Truong Buu Diep meshitetba sentong nung nisung 70,000 dak tema adentsü teimla nung Catholic Church in Vietnam renemshiba mapang lir.

Iba beautification ceremony ya July 2 nü southern Vietnam nung Can Tho diocese kübok Tac Say Pilgrimage Center nung alitsü.

Diocesan vicar general Father Peter Vu Van Hai-i iba sentong ya local church asoshi temoatsü alizüng ka asütsü ta ashir.

"Iba sentong ya local Catholics kisüng atema masü, saka sarasademner, shilem aginer ajunga asoshi lir," ta pai ashir.

Iba sentong nung Pope Leo XIV indang special envoy ama Vatican nung Dicastery for Evangelization indang pro-prefect, Cardinal Luis Antonio Tagle-i ketdang asütsü.

Par arogoi Tax Say Church tejakdang ali hectare pongu nung nisung 47,000 asemtsüsa ceremonial grounds yanglua lir, ta organizing committee tekolakba Hai-i ashir.

Temeket nung arogo indang grounds nung Diep indang leper yanglua lir, aser yangi ano nisung 25,000 asemtsüsa süki, LED screens aser sound systems inoka lir.

Healthcare stations, traffic control channels aser sanitation facilities densema tongtipang ki

o jen tem June 25 tashinung renemtsü imlar. Northern Bui Chu diocese nungi kentener 535 aliba brass band ajanga iba sentong nung shilem agitsü.

Yangji aliba Catholics nunger temi sentong nung adenertem asoshi complimentary breakfasts 40,000 dak tema tenla agütsütsü, ta Hai-i ashir.

Iba sentong nung diocese-i Diep indang noksa aser keraklong sayatsü, koba historical records tem nungi bendena yangluba lir. 1997 nungi amshia aruba drawing ka iba noksa yagi melentsü.

Diep ya January 1, 1897 nung aso aser 1924 nung putir ka ama ordained asü. Pa Mekong Delta nung yimdak yimtsüngtem nung tenzüka liasü aser Vietnam aser Cambodia nung arogo tem tenzüka asoshi pa tushia amshir.

France sepaitem Vietnamese communist tsüngta First Indochina War (1946-54) mapang pai makamaiter anepalua Catholic nunger kumzüka ayu.

Region nung azüdokshi liaka aser yangji aliba Catholic nunger temi aiben mepishiaka Diep-i par arogo yutsütsü memulung.

Diep ya Japan nunger sepai kati reshikangshia amshir tepset, shiba World War II tembangba sülen Vietnamese communist forces nung arua jenoka liasü. Pa March 12, 1946 nung tepsetba sülen pa temang lepar tzütu ka nung indoka liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yimtep

(v) nisungtem rongnung tesentaktep yanglu (making relationship)

* Nisungtem rongnung tembar yimtepba sobaliba ya benshitsüla.

Yimti

(n) nüt süng aika aliba yim (big village, city)

* Yimti nung yimsüsürtemi nübortem timtem aser nüngdak metettsüla.

OLONG PAITEP # 7544

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S_ _ _ i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7543 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

May 2026 nung Er Chow Kiat-i "most spin-and-strike drumbeats in one minute" indang alima otsü tasen ka yangluogo. Er-i second 60 nung 233 beats temtetba ajanga iba otsü tasen yanglua liasü.

Arishi küm 36 tain Er dang CK mesüra Chow ta-a ajar aser pai Taiwanese kentenertem Angela Zhang and WeiBird, guitarist Paul Wong, Hong Kong rock band Beyond, aser Brazilian guitarist Mateus Asato nunger den külemi drum temogo.

Meghalaya nung Film City, Film Institute aser Music institute lapoktsü

Shillong nung Hello Meghalaya Music Awards alidang Chief Minister Conrad K Sangma-i kentener Reble nem "Icon of the Year" sempet agütsüdang agiba noksa ka angur.

Shillong, June 23, 2026

(Agencies): Meghalaya kübok Shillong nung Film City ka aser Film Institute ka den Tura nung Music Institute ka lapoktsü sentong lir aser iba ajanga creative sector ulushitsü ta Chief Minister Conrad K Sangma-i ashi.

World Music Day tenüng nung Shillong nung Hello Meghalaya Music Awards lapoktsüdang CM Conrad-i iba osang metetdaksü.

Sorkari Meghalaya ya music, filmmaking aser digital content production atema tongtipang tesem ka kümdaktsütsü mangdang lir ta

pai ashi.

"Item rejutem ajanga creative professionals asoshi ecosystem tajung bentsür arutsü aser infrastructure, training opportunities aser long-term support angutsü" ta CM Conrad-isa shisem.

"Teti inyaka aruba terenlok mapatem den creative economy ya kasa tongtipang lir kechiyong iba ajanga mapa adokdaksünür aser lanurtemi parnok jangraba den putepa careers meranger" ta paisa ashi.

"Chief Minister's Grassroots Music Programme ajanga Meghalaya nung artists 7,000 tema yarir. Iba programme ya

local musical talent anepaluba aser Meghalaya sobaliba takar ajungketba indang sorkar tongti mapa ka lir" ta CM Conrad-isa shisem.

2024 nung Hello Meghalaya ta ser over-the-top (OTT) platform tenzüka kanga renloka arudar. Iba sabang ya regional storytelling aser locally produced content ajungkettsü atema tentetogo.

Hello Meghalaya OTT platform nung films, music productions aser tanga digital content dena 1,000 titles tema lir aser five lakh downloads adenogo ta ketdangsürtemi ashi.

Kangpokpi hills nung prangpong-injang aika angu**Imphal, June 23, 2026**

(Agencies): Manipur nung tesüiba anogo asem tashi Kangpokpi district kübok tesem balala mita aodang prangpong-injang aika ngutetogo.

Leilon Vaiphei, Leilon Munlui, Molhoi, P. Moulding, Leilon Khunou aser temeket tesemtem nung telungpurtem aliba osang angazükba sülen June 20 nungi joint counter-insurgency operation tenzüka ta

Manipur Police-i ashi.

Iba operation nung Manipur Police, Central Reserve Police Force, Rapid Action Force, Commando Battalion for Resolute Action, aser Indian Army külemi yaritepa inyaker.

Iba mapang telungpurtemi sepaitem dak injang khalokja noktangtsü merang saka sepaitemi search & combing operations tulu inyak ta Manipur Police-isa ashi.

Iba operation nung sepaitemi 17 single & double-barrel guns, AK-47 assault rifles, M4 Carbine, Self-Loading Rifles (SLRs), SKS rifle, sniper .303 rifle aser Single Barrel Loading (SBL) rifles aika ngutetogo.

Manipur nung ketdangpurtemi mepetmesü adoka alidak yimjung bener arutsü aser tensa süngjemtsü atema security operations inyaka arur.

Khandong dam gates tenet lapoker tzü chioker**Guwahati, June 23, 2026**

(Agencies): Dima Hasao District Disaster Management Authority (DDMA)-i Khandong reservoir nung gate tenet lapoka tzü chiokba osang metetdaksüogo.

DDMA-isa Kopili river anasa aser iba ayonglanglen alirtem dang kümdang alitsü osang sangoktsüogo.

Khandong reservoir nung shilem lemsar spillway gates ajanga tzü talila bendena aliba chioker. Iba mapang nübortem kanga kümdanga alitsü aser ayongi marutsü mesüra ayong tzü mamshitsü metetdaksür ta DDMA-isa ashi.

Ketdangsürtemisa nübortem dang ayongküm anasa nungi shiruru, garitem aser tanga osettsüset belentsü metetdaksüogo. Parnokisa official mobile aser WhatsApp channels ajanga tzü chiokba osang meteta alitsü mepishia shiogo.

District Emergency Operations Centre-ia emergency atema helpline services lapokogo.

**NOTICE FOR APPOINTMENT OF MAK LUBRICANTS DISTRIBUTORSHIP**

Bharat Petroleum ya Fortune 500 nung aliba Public Sector Oil Company ka lir. **MAK Lubricants** ya onoki yanglur - linük nung tajungtiba lube brands rongnung ka lir. **MAK Lubricants** ya gari yanglur temia junga agizüka lir aser OEMS (Original Equipment Manufacturers) tulutem den Genuine Oils asoshi sendaktepa lir. Onoki yangluba lubricants nungya automotive & industrial lubricants, greases, gear oils, brake fluids aser coolants. Onoki Odisha, Jharkhand, Bihar, West Bengal, Sikkim, Assam, Nagaland, Mizoram, Meghalaya states tem asoshi **Primary Lube Distributors (PLD)** aser **Industrial Lube Distributors (ILD)** shimmer. Advertisement tejangja onok indang website www.bharatpetroleum.in? Tender View Tender New Tender Select: Date From (24/06/2026-16/07/2026) Due Date (16/07/2026) Select Department: Lubricant - Distributorship Choose a Tender Type: Press Open File "Eastern Region Lubes Network Expansion 2026-27" nung angutsü.

Forms ya website nungi download sütettsü, koba fill sür nüngdakba fee den külemi pei territory offices nem website nung aliba ama agütsütsüla. Metongshitsü, kar lira, tekalen shia aliba website kisüng nung agütsütsü.

Application agütsütsü anogo tatem: 16.07.2026, 18:00 hrs

Contact Details:

TM Bhubaneswar: 88110 92869, TM Ranchi: 73826 26814, TM Patna: 97114 48439, TM Kolkata: 70860 46809, TM Guwahati: 82911 40139



Energising Lives, Energising Naya Bharat

Pakistan nung Iran Tir Pezeshkian arua lir



Islamabad, Aami/June 23 (Agencies): Iran Tir Masoud Pezeshkian tanü Pakistan tongogo, koba United States aser Israel nati February 28 nü Iran amakba sülen bendang limai aoba mezüngbuba alitsü.

Pezeshkian ya Mongulbarnü Islamabad anasa military base ka nung Palistan Tir Asif Ali Zardari, Ato Kilonser Shehbaz Sharif aser Deputy Prime Minister aser Foreign Minister Ishaq Dar nungeri agizük.

Pezeshkian den minister aser ketdangsürtem arua lir, aser parnoki Sharif den jembishinü akatsü aser Zardari-a ajurutsü imlar.

Pakistan indang Ministry of Foreign Affairs ajanga ashiba agi, Senate Chairman Yousaf Raza Gilani, National Assembly Speaker Ayaz Sadiq, aser Deputy Prime Minister and Foreign Minister Ishaq Dar nungeri Iran nunger lenirtem den ajuruteptsü.

"Iba mapang linük anati linük ana tesendaktep ajunga

reprangshitsü aser tarutsü nung trade, energy, border security, people-to-people exchanges aser regional connectivity densema sectors balala nung tesendaktep akangshitsü atema lenmang tasen bushitsü," ta ministry-i Hombarnü sangdong ka nung shia liasü.

Pakistan aser Qatar tetsüngtai ia Iran nung rara tembangtsü asoshi United States aser Iran tsüngta senden mezüngbuba Switzerland nung aliba Bürgenstock yimti nung mener Pezeshkian-i Pakistan semdanger alitsü.

Tezüngzüktep nung shilem ka ama US-i soita aliba Iran nunger sen \$12bn salatsü. US-i ano Iran nem international sanctions agüja aliba khen asoshi agentsü sangdongogo, anungji August 21 tashi par totzü aser petrochemicals tem yoktettsü.

Tatembang tezüngzüktep ka yanglutsü asoshi anogo 60 tsüngta lenmang bushitsü pangjemer

jembishinü tembanga liasü.

Ibai Pezeshkian asoshi tir ka ama Pakistan tanaben semdanger alitsü. Pai August 2025 nung mezüng semdang, koba Israel aser Iran tsüngta anogo 12 raraba sülen liasü.

Ibai Pakistan tetsüngtai ia US Tir Donald Trump aser Pezeshkian nati June 18 nü meyongnem agütsüba Islamabad Memorandum of Understanding asoshi tepela lemsatapa semdanger ama aikati angateter, kong Pakistan Ato Kilonser Sharif-a odongtar ama meyongem agüja lir.

Islamabad MoU ya ajanga Switzerland nung yimjung ken o jembishinü tenzükogo.

"Tang semdangba ajanga Islamabad Memorandum of Understanding nung meyongnem agütsüba sülen yimjung ken o jembishinüba nung tongtipang maongka agütsütsü," ta Pakistan indang Ministry of Foreign Affairs ajanga sangdong nung ashi.

Office of the
Longsa Pongen Kidong Telongjem

H.Q: Longsa, Mokochung -798601

KONANG TETUSHI AGÜTSÜR

May 7-8, 2026, 1st International Conference on Veterinary & Animal Husbandry Sciences (ICVAHS-2026) akaba mapang Indian Society of Veterinary & Animal Husbandry Research (ISVAHR) ajanga **Dr. Intiwati Pongen** (S/o Late. Likoktuba Pongen & Mrs. Jongpongllila of Longsa Village) nem konang tulu aketba "Young Scientist Award" agütsüba osang angashia Longsa Pongen Kidong-i kanga pelar aser tenüngsang agütsür.



Iba takok ngutetba ya pai Veterinary aser Animal Husbandry Science luyim tsütsü bendanga aser nentaka inyakba tamaitü lir. Pa ajanga lanur jenti ajungmesoba den Tsüngremi pa tarutsü wadang ajak nung maneni moajangma ta sarasademtsür.

Longsa Pongen Kidong tenüng nung;

Sdl/-
Imtisunep Pongen,
Convenor

Sdl/-
Bendangnungsang Pongen
Secretary

Office of the
Khensa Village Council
METETDAKTSÜR

Khensa yimden ajanga sangdong ka yamai metetdaksür. Khensa aser Mariani lenmang nung shingaia jana indoktsü memelar. Aibelener tapet temerenshi alitsü.

Sdl/-
I.Alemmeren Longchar
Chairman
Khensa Village Council

Sdl/-
Zulutoshi
Secretary
Khensa Village Council

SANGDONGER

Shri. Chubatemsu Jamir (S/o Late Mesoatsu Jamir, Mangmetong), pai shirnok dangsa sen apua lir, itemji kinungertem aser kidang kimangi memetet aser kuli süja mali.

Anungji iba sangdong ajanga sen apuja alir ajak dang onoki memetetba senputsüpubatem ajakji Shri. Chubatemsu Jamir jurila khuret aser kinungertemi iba keno mabentsü ta metetdaksür.

**Kinunger aser kidang kimang tenüng nung ;
Lanukumzuk Jamir
Mangmetong**

Senotsü ochi mashi ken o nung taoba Nepal finance minister puogo



Kathmandu, Aami/June 23 (Agencies): Taoba Nepal finance minister Bishnu Prasad Paudel, senotsü ochi mashi ken o dak sendakba nung Hombar aonung puogo. Linük nung Gen Z-i nongita yariba sorkari taoba sorkar kübok ochi mashi inyakyimtem ajak kaktettsü merangba mapang tang pa puogo.

Arishi küm 66 tain Paudel ya Communist Party of Nepal (UML) lenir tejen ka aser taoba K.P. Sharma Oli sorkar kübok

tongtibang lenir ka liasü. Pa Nepal anüolen hotel ka nung apu, ta police-i ashi.

Police otongdar Abi Narayan Kafle-i ashiba agi, Paudel ya Kathmandu-i anir aruogo aser pa Department of Money Laundering Investigation nem bendanga agütsütsü.

Lanurtemi anir sorkar anema longkak aita Oli-i aniba sorkar atsüngtokba sülen ita ishika dang lir pa puogo.

Sorkar inyakyimtem anema

longkak aiba mapang nisung 76 asü aser nisung 2,500 dak tema yirua liasü. Kasa mapang nung longkak aitba mapang parliament densema sorkar meyong ki aika nung mi senoka rondaktsü.

Longkak aitba mapang azütokshi ledong menokdangtetba atema Oli aser home minister na apu. Tena tangbo bial nung chioker lir.

Arishi küm 36 tain rapper aliba nungi yimden yimsüsür akümsang Ato Kilonser Balendra Shah-i aniba teloki election akokba sülen pa March ita PM aküm. Election atema nüboyimba mapang parnoki ochi mashi inyakyimtem raktoktsü aser taoba mapang pei mulung ka nung tashi alia amshirtem anema jenjang agitsü tenangzükba agüja liasü.

Ken o dak sendakba nung Paudel den tongtepratepdang saka osang kecha mangu. Ajisüaka UML ketdangsür kati ashiba agi, iba ken o sensak asemstsü atema party lenirtem Mongolbarnü ajuruteptsü.

Paudel ya term balala nung minister mapa balala bener aruogo.

Israel-i Lebanon nung nisung ana tepset; ceasefire tendanger

Beirut, Aami/June 23 (Agencies): Israel-i Mongolbarnü southern Lebanon nung nisung ana tepsetogo, ta Lebanon Civil Defence aser health ministry nati ashi. Iba tatalokba sülen ceasefire benoker aliba anema inyaksangshiba atema Hezbollah-i Israel aitsüogo.

U.S.-Israel nati Iran ama tenzükba sülen Hezbollah puria Israel amak tenzük aser iba ajanga rara tenzükshia liasü.

Ceasefire benokba sülen nüburtem pei kidangi meyipa ao tenzükogo. Ceasefire ya shita benoka inyaktsü minyaktsü mejangjaba den Israel nunger sepaitem maneni Lebanon nungi mainshi-i liaka nüburtem pei kidangi meyipa ao tenzükogo.

Iran-i US den tenangzüktepba nung shilem ka ama Israel dang Lebanon amakba anentsü atema takhangba agütsüogo.

Deobarnü sülen tang mezüngbuba Lebanon nung nisung tepsetogo.

Israel nunger sepaitemi Nabatieh al-Fawqa kübok al-Deir tesem nung bulldozer kati lenmang mereka aliba anasa nisung telok ka dak injang

khaloktsü, ta local mayor aser Lebanon state news agency NNA nati ashi.

Iba tatalokba dak sendakba nung Israel military-i kecha telangzüba magütsü.

Tanga tatalokba ka nung Israel military-i ashiba agi, parnoki Ali al-Taher tesem nung kiralongrartem makogo, shirnok amokmeren ka liasü.

Kasa mapang nung Hezbollah-i Nabatieh al-Fawqa nung civilian ana khasetba indang osang metetdaksü aser ceasefire anema inyaksangshiba atema Israel aitsüogo.

Iba tatalokba indang asüngdangba mapang United Nations dangi Iran ambassador Ali Bahreini-i osangbenertem dang ashiba agi, Lebanon atema tenangzüktepba yanglur aliba anema jenjang agira yimjung atema sensaksem nung tetsükdaktsü adoktsü.

Israel Ato Kilonser Benjamin Netanyahu-i Hombarnü ashiba agi, Hezbollah-i parnok amokmerenba anema telangzüba agütsütsü asoshi parnok shingaia menokdangtettsü aser nüngdakba mapang tashi Lebanon nungi matsüngshitsü.

FIFA WC: Argentina, France, Norway aser Algeria nungeri takok angu



Aami/June 23, 2026

(Agencies): Hombarnü Texas nung Argentina aser Austria na asaya nung Lionel Messi-i goal ana idakja Argentina-i iba asaya kokogo, aser Messi ya World Cup puti otsü nung goal timtiba idaktsüba asayar kümogo.

Maneni iba asaya akokba sülen Argentina team round of 32-i iogo.

Taküm iba asayamung nung Argentina pur mezügbuba asaya nung goal asem idaktsüba sülen Messi-i maneni tanabuba asaya nunga goal ana idakja pai tang tashi nung goal 18 idaktsür lir.

Asaya nung arishi küm 38 tain asayar yagi asaya anabuba atonga hat-trick idaktsür lila, saka asaya tetenzüklen penalty metsütsü maongka anguba pai tezülteni metsütoka liasü.

Asaya nung minute 38buba nung Messi-i mezügbuba goal idaktsü aser tanabuba goal ya mapang apuloktsür asayaba mapang paisa idakja liasü.

Tanga asaya ka nung France-ia Philadelphia nung goal 3-0 agi Iraq kokogo. Iba asaya ya Kylian Mbappe asoshi

France tenüng nung asaya 100buba liasü aser pai goal ana tashi idaktsü. Asaya akokba sülen France team Round of 32-i iogo.

Asaya nung mezügbuba goal ya Real Madrid nungi asayar yagi minute 14buba nung idaktsü. Iba sülen asaya tanabuba shilem nung minute 54buba nung defender Zaid Tahseen aser goalkeeper Basil na mangatettepba ajanga France nem maongka agütsü, aser Mbappe-i tanabuba goal idaktsü.

France atema tasembuba goal ya Ousmane Dembele-i idakja liasü.

Senegal den mezügbuba asaya nung goal ana idaktsüba den iba asaya nunga goal ana idaktsüba sülen Mbappe WC nung goal timtiba idaktsürtem rongnung Miroslav Klose den kasa kümogo aser pai Messi dang memenepi lir.

Kasa asayamung tanga asaya ka nung Norway-i goal 3-2 agi Senegal koka parnok Round of 32-i iogo.

Asaya nung Erling Haaland-i goal ana idakja pai tang tashi

nung iba asayamung nung goal pezü idaktsür lir aser Norway tenüng nungi asaya 52 nung asayaba mapang goal 59 idaktsüogo.

Norway atema mezügbuba goal ya substitute Marcus Holmgren Pedersen-i idaktsü aser Haaland-i asaya tanabuba shilem tenzüker minute asem tsüngda tanabuba goal idaktsü. Iba sülen Haaland-isa tasembuba goal idaktsü.

Senegal-ia kanga meranga asaya aser Ismaila Sarr-i parnok asoshi goal ana idaktsü, saka goal tasembuba midaktsüteti asaya makok.

Maneni Group J nung Algeria aser Jordan na asaya Algeria-i goal ka chir aliba nungi meyipa tur goal 2-1 agi asaya kokogo.

Asaya nung Nizar Al-Rashdan-i minute 36buba nung Jordan atema goal ka idaktsü saka Algeria atema Nadhir Benbouali aser Amine Gouiri nati goal kaka idakja parnoki asaya akok.

Iba asaya makokba sülen Jordan pur asayamung nungi tsükogo.

Tanabuba test makokba sülen ICC-i England team merenshi

Aami/June 23, 2026

(Agencies): New Zealand den Tanabuba Test asaya makokba sülen ICC-i England cricket team merenshiogo.

Atakzükja aliba mapang dang nungi over 12 agi talila agiba atema ICC-i England indang World Test Championship point 12 ajemtsüogo.

Points ajemtsüba sülen England team-i point 38 dang ngua WTC table nung parnok tenetbuba nung lir. Parnok indang points percentage-a 34.72 aliba nungi 26.38 dang kümogo. Asaya makokba den point 12 ajemtsüba ajanga England team kanga akoksaogo.

Tanabuba Test ya Joe Root lenisüba nung asaya aser parnoki asaya run 253 agi mekoki liasü. Mezüng bowling asütsü shimba sülen England-i New Zealand nem run 391 yangludaktsü aser parnoki meyiper run 291 dang yangluteta run 100 agi NZ memenepi liasü.

Tanabuba innings nunga NZ-i run 362 yanglua target run 463 toktsü. Ajisüaka England team-i run 209 dang yanglur asaya ajak out süatok nung asaya run

253 agi makok. Asaya nung Root-i run 123 yanglua pai Test Test cricket asaya nung ajak senteper run 14,000 yangluogo.

Kasa mapang nung Ben Stokes tasembuba Test atema squad nung züngoksemogo aser pa lenisüba nung team asayatsü. Gus Atkinson-a squad nung züngoksemogo. Asayar anaprongla ya nightclub ka nung mepetmesü atalokba nung densema sülen tanabuba Test atema meshim.

England Cricket Board-i, Ben Stokes aser Gus Atkinson na test team nung tanaben züngoksemba indang osang ka agütsüogo. "Ben Stokes aser Gus Atkinson na June 8 nü tatalokba dak sendakba nung ECB disciplinary hearing tembangba sülen New Zealand den tasembuba Rothesay Test atema squad nung züngoksemogo. Stokes aser Atkinson nati tenangzüktepba yanglur aliba anema jenjang agiba ngutetogo," ta ECB-i ashi,

"Tanabuba Rothesay Test atema meshimba den bendenloksema tena nem tezüluba nung tekümdangtsü ka metetdaktsüogo," ta kasa sangdong ajangsa metetdaktsü.

Indiasquad nung Suryansh-i Nitish Kumar melenogo

Aami/June 23, 2026

(Agencies): Ireland aser England na den taruba T20I asayamung atema BCCI-i India squad nung Nitish Kumar Reddy meleno Suryansh Shedge shimogo. Reddy ya quadiceps yiruba sülen masayatetsüsa aküm.

Afghanistan den June 20 nü ODI tasembuba asayaba sülen Nitish-i pa indang quadiceps tabelen nung minprong ka aliba indang metetdakja liasü. Pa temang tendangba sülen BCCI Medical Team-i pa mapang tatsüka atema anisüngzüka temang anepalutsü tetuyuba agütsüba sülen pa iba asayamung ana nung masayatetsüsa aküm.

Arishi küm 23 tain asayar ya Lucknow nung Afghanistan den tanabuba ODI nunga masayatetba sülen tang yiruba ajanga tetsükdaktsü adokogo. Pa asayamung atema squad nung züngoksemer liasü, saka yirushiba ajanga masayatetsüsa kümogo, aser pa kodang nungi asaya tenzüktettsü iba indang osang tejangja memetet.

India team Belfast nung June 26 aser 28 nü Ireland den T20I

ana asayatsü aser iba sülen England nung oa July 1, 4, 7, 9 aser 11 nü T20I pongu asayatsü.

Sri Lanka nung tawa tri-series nung India A team nungi kanga junga asayaba sülen Shedge senior team nung züngoksemogo. Arishi küm 23 tain middle-order batter yagi asaya pongu nung run 147 yanglu aser asayamung nung over 23 ona liasü.

2024-25 Syed Mushtaq Ali Trophy asayamung nung pa ya Mumbai team nungi ajak dang tajungtiba asayaba asayar ka liasü. Lower middle order nung batting amenba mapang Shedge-i run 131 yanglu aser pai asaya kanga junga tembangtetba ajanga asayar shimertemi pa ladanga liasü.

Official osang magütsü tsüngda Nitish meleno Shedge shimtsü akok ta bilema liasü.

India nunger asayartem Ireland den asayamung atema ao tenzükogo. Sanju Samson, Axar Patel, Vaibhav Sooryavanshi, bowling coach Morne Morkel aser fielding coach T Dilip nunger Chennai nungi apusoago aser ano asayar kar Mumbai nungi aotsü lir.

NPA-i Pickleball Zonals atema Vilasier sponsor asütsü

Dimapur, Aami/June 23

(TYO): Nagaland Pickleball Association (NPA)-i sangdong ka ajanga, taruba Pickleball Zonals - North 2026 asoshi Vilasier Khathe sponsor asüba metetdaktsüogo.

Iba asayamung ya June 24 nungi 28 tashi asayatsü.

Iba asayamung ya Pickleball World Cup 2026 atema Team India Open Category asoshi official selection asayamung asütsü. Pickleball Zonals - North nung Pro Category nungi shimba asayar India tenüng nung Pickleball World Cup 2026 nung asayatsü maongka angutsü. Asayamung nung Da Nang, Vietnam nung August 30 nungi September 6 nü tashi asayatsü.

Nagaland nungi asayartem nongita yaritsü atema bendanga agütsür aliba nung shilem ka ama NPA-i Khathe iba asayamung nung asayatsü atema senotsü teyari ajak agütsütsü, kong pa registration fee, tayimtsü taah, tanendak aser official team jerseys

renemtsüba ajak densema lir.

Khathe ya category ana: 30+ tebur kija asaya aser Pro tebur kija asaya. Pa Pro tebur kija asaya nung toktepba ajanga taruba Pickleball World Cup atema India team nung shimoktsü asoshi timla lir.

Vilasier Khathe ya takok tajung ngua asayaba asayar ka lir, shiba tennis aser pickleball naprongla temaba jenjang nung asayar. Khathe-i tennis asaya nung takok aika nguogo, kong All India asayamungtem nung kija aser tarep asaya 100 dak tema akokba aser international title 17 tashi bener aliba densema lir.

Pa national rankings nung Under-16 nung No. 2, aser Under-18 nung No. 4 aser tebur open category nung No. 27 tashi tonga asayaogo. Pa 2010 küm International Cup World Juniors nung India tenüng nungi asayaogo.

Tennis nung takok ngua asayaba den Khathe ya India anütoklen pickleball asayar tajungtiba ka kümogo. Kolkata

Open 2026 nung pai gold medal ana aser silver ka angu aser pa Player of the Tournament liasü.

Maneni Guwahati Open 2026 nung pai Open tebur kija asaya, 30+ tebur kija asaya aser 30+ tebur tarep asaya nung gold medal asem nguogo.

Kanga tongtibang selection asayamung ka nung Nagaland tenüng nungi asayaba mapang Nagaland Pickleball Association-i, Vilasier Khathe-i kanga junga asayatsü imlaja ataba lemsatepogo. Pai takok tajung ngutettsü ta association-i tamang akar, aser pai iba asayamung nung shilem agiba ya Nagaland atema dang masü saka North-East ajunga atema alizüng tasen ka tongtetba asütsü, ta NPA-isa ashi.

Maneni Khathe ajanga Nagaland aser Nort-East nung asayar timba national aser international nung takok ngua asayayonga aotsü asoshi ajungmesotsü imlaba Nagaland Pickleball Association-isa lemsatep.

BILEMDANGANG

"Tajung aika bilemaka mapa kuma minyakra kechi tajangzük ali."